



## **ATASSUT INATSISARTUNI**

**ATASSUT**

**Steen Lynge**

**UPA2015/58-115-1**

**21.04.2015.**

**Inatsisit attuumassuteqartut allanngortinnejarnissaannut siunnersummiik UPA 2016-imut  
Naalakkersuisut suliniuteqaqqullugit peqquneqarnissaat pillugu Inatsisartut  
aalajangiiffigisassaattut siunnersuut, taamaaliornikkut inoqutigiit 400.000 kr.-t ataallugit  
isertitallit napparsimasut angerlarsimaffianni nerisaqarnermut ineqarnermullu  
akiliuteqartarunnaarsinnaaqquullugit.**

(Inatsisartunut ilaasortaq Anthon Frederiksen, Partii Naleraq)

**Pinartumik napparsimasoqartillugu ilaquaasut Københavnimi kalaallit peqqissartut  
najugaqarfianni ineqartinnejartillugit ineqarnermut aningaasartuutit 2016 aallarnerfigalugu  
pisortanit akilerneqartalernissaat sulissutigeqquullugu Naalakkersuisut peqquneqarnissaannik  
Inatsisartut aalajangiiffigisassaattut siunnersuut.**

(Inatsisartunut ilaasortaq Mimi Karlsen, Inuit Ataqatigiit)

Partii Naleraq sinnerlugu Inatsisartuni ilaasortaq Anthon Frederiksenip siunnersuutaa aammalu  
Inuit Ataqatigiit sinnerlugit Inatsisartuni ilaasortap Mimi Karlsenip siunnersuutaa, tamarmik  
Kalaallit peqqissartut najugaqarfianni qanigisaasut najuussinnaanerisa aningaasatigut  
oqilisaaffigineqarnissaannik siunertallit ataatsimoortumik imaattumik oqaaseqaateqarfigissavagut:

ATASSUT sinnerlugu Naalakkersuisunut ilaasortaatitarput Knud Kristiansen allanik pisassaqarluni  
Københavnimiinnermini Kalaallit peqqissartut najugaqarfiat pulaarpaa tassanilu peqqissartut  
qanigisaallu najuuttut ilaat oqaloqatigalugit.

Kalaallit peqqissartut illuanni najugaqartut peqqissarneqarnerminni Danmarkimiittariaqartut  
qanigisaminnik najorlerneqarsinnaanissartik assut amigaatigisaraat peqqissartut namminneq  
oqaatigaat, allaallu assersuutinik saqqummiussipput qanigisaminnik nukittorsaatissaqarlutik  
peqqissartut najorneqanngivissortunut sanilliullugu peqqisilertornissaminnut periarfissaat  
annertunerusoq.



## ATASSUT INATSISARTUNI

Taannaannaanngilarli, aamma maluginiarnarpoq sullinneqarnermut nerisaqarnermullu tunngatillugu sapinngisamik annerpaamik naammagittarniaraluarlutik ippingiatornerat annertuujuusoq, allaallu peqqissarneqarnerminnut atatillugu immikkut nerisaqartariaqartut immikkut sullinneqarnerat killeqartorujussuusimasoq, ilaatigullu oqaatigineqarluni peqqissartut peqqissilertorsinnaanerat siunertalarugu Rigshospitalimi nakorsat immikkuullarissumik piumasaqaataat Kalaallit peqqissartut illuanni naammassiniaruminaatsinnejarsimasoq.

Qanigisaasut najuussinnaanerat paasisagut naapertorlugit periarfissaanngingajappoq, inuppalaanngitsumik ilaatigut pineqartarsimasut aamma ersersinnejarpooq, assersuutigalugu aanaasoq ernuttaminik meeqqamik nukangasumik Danmarkimiittumik tukkusqarumagaluartoq hotelimitut akisutigisumik ernutaasoq akiliippat aatsaat tamanna pisinnaasoq akineqarsimapput, aali tukkutitsiniaannaraluartoq.

ATASSUT-mit assut pingaartipparput Kalaallit peqqissarnerminnut atatillugu  
Københavnimiittariaqartut sapinngisamik annerpaamik pitsaanerpaamillu sullinneqarnissaat  
Naalakkersuunikket isumannaakkamik isumagineqassasoq.

Tamaammat siunnersuutit matumani pineqartut, aningaasatigut killeqartumik pisortat pisinnaasaqarluarpataluunniit atukkamikkut qanoq inisisimanersut, sullinneqarnerat qanoq ittuunersoq, qanignerpaasaminnik najorneqarsinnaanerminnut periarfissaat qanoq pitsangorsarneqarsinnaanersut minnerunngitsumillu Kalaallit peqqissartut nagugaata ingerlanneqarneranut sipaarniarnissamik anguniagaqartoqalersimanera qanorpiaq kinguneqassanersoq pillugu misissorneeqaqissaartariaqartoq ATASSUT-mit naliliivugut.

Taamatut oqaaseqaateqarluta ATASSUT-mit inassutigissavarput siunnersuutit aallaavigalugit nalilersueqqissaartoqarsinnaaqquullugu aammalu misissorneqartariaqartutut ATASSUT-mit nalilikavut aallaavigalugit qulaajaasoqarsinnaaqquullugu inassutigissavarput ataatsimiititaliamit susassaqartumit suliarineqartussanngorlugit aappassaaneerneqartinnagit ingerlateqqinnejassasut.